

沈石田集

埽葉山房
石印

石田先生集

長洲沈 周啟南著

後學錢允治功甫校

陳仁錫明卿編

七言絕

初春

番煖番寒似小兒。嫩春天氣作嬌癡。預先辦酒等花發。醉到花飛一霎時。

七月十五日城中晚歸

晚郭歸舟急若何。市塵猶恐累漁蓑。到家覺得爭風雨。兩樹芭蕉破葉多。

和吳匏菴姚氏園池四絕

宮庶才名天下知。舊題留在此園池。墨痕蠹盡重翻稿。二十年來似夢時。

其二

蛩起治園晚始歸。黃昏蝙蝠滿堂飛。人家夜例開門睡。甚矣先生併去扉。

其三

雨後春池漫石磯。櫻桃梅子兩爭肥。東風試煖諸生暇。閒就滄浪浣舊衣。

其四

小小園池儘自清。不曾誇大命新名。看花看竹多佳客。竹與追陪花送迎。

道傍酒館

酒香觸路酒旗青。去馬來車到此停。信是利糟名粕釀。行人醉煞不曾醒。

題致道觀靈蹟二首

藏丹地底發金輝。半夜通明識者稀。生子老師還急起。畫符封井鴿先飛。

其二

檜蛟欲走夜壇雷。飛石驚門不敢開。明日道人成一笑。綠陰仍鎖舊樓臺。

題富翁扇

翡翠堂深酒殢人。風簾吹上一鉤銀。門前怪見春狼籍。却惜飛花散四鄰。

贈老人

淚滿雙頤雪滿顛。一身憔悴自應憐。座中誰似楊開府。莫易逢人話少年。

讀荊公爭墩詩

荒墩落日草蕭蕭。公我相爭已異朝。黃土不知今古姓。亦無百姓種青苗。
經舊遊

最無根柢是豪華。昨日池臺又別家。種種傷心秋雨裏。芙蓉只好不看花。
淵明采菊

典午江山醉不支。先生歸去自嫌遲。寄奴蔓草無容地。慳剩黃花一兩籬。
子陵垂釣

一出聊全故舊私。急歸自信海鷗姿。中間亦有君臣誼。買菜侯生豈得知。
思理衣

七十餘年一老翁。心情鶻突腦冬烘。寒衣無婦無人補。日日開窓怕北風。
其二

七十餘年一老翁。衣穿絮破不堪縫。清霜滿地無區畫。掃得蘆花莫禦冬。
睡起小酌

黃鸝啼夢粉牆東。簾幕深沈日日風。起煥酒杯尋一醉。春愁打破落花中。
病起

病骨支窮却下堂。瘦顏衰鬢入愁鄉。黃鸝饒舌花饒笑。一樣春風有別腸。
睡起

欲晴不晴雲閣雨。欲落未落日掛山。道人睡起思如水。閒倚長松數鶴還。
聞楊君謙致政賦此以致健羨

秋空歸鶴楚雲高。白首青山白苧袍。多少玉堂金馬客。待抽身得已霜毛。
其二

都門祖帳百花飛。多見龍鍾賦式微。較取柳條千萬折。不曾送一少年歸。
其三

碧山勾引步如飛。少日知閒古亦稀。只有馮良年頗似。又非曾惱督郵歸。
送周桐村

白髮烏紗將八十。文章談笑見楊雄。風流不減三年別。未許尊前稱阿翁。
其二

看到梅花十萬株。清吟一月住姑蘇。城中屏障都題遍。施與吳人百斛珠。
送張廷儀

楊梅墮地連日雨。江上喚舟舟不來。黃帽唱歌今撥棹。青天白日眼俱開。
喜張碧溪至

重子杖藜非厭貧。秋林紅葉頗如春。交遊未必在杯酒。正是老年無故人。
題嚴子陵像

聞道先生褻足時。曾無一語答相知。後來亦有同衾者。再四能歌抱蔓詩。
西湖竹枝詞

春風楊柳綠絲絲。似妾千思復萬思。妾家有酒沙糖味。郎若來嘗便得知。
其二

妾在船頭偷看郎。郎騎白馬好風光。錦樣荷花三十里。中間一對紫鴛鴦。
其三

杏子單衫窄樣裁。荷花嬌貌一般開。中心有事誰知得。酸去酸來只怨梅。
柳枝詞

春夢沉沉鳥喚醒。烟條雨葉為誰青。別離多少東風恨。不在長亭在短亭。
題魏公美小像

鶴山孫子舊家聲。讀易重開水上亭。昨夜梅花四簷月。清光不照太玄經。
書扇三絕壽繼南

與君今為老兄弟。我已將衰君正強。自愧無聞四十二。鏡中殊覺鬢滄浪。
其二

孟秋七月廿七日。喜子懸弧屬令辰。與婦持漿挈兒女。堂前同拜白頭親。
其三

躬耕力食我不厭。辛苦讀書君自安。待取他年婚嫁畢。白頭同話保家難。
答友人求詩

索詩又是一年餘。誰道休文懶未除。多病閉門芳草歇。秋來却愧故人書。
促陳啟東和章

竹影樓陰轉夕陽。懷人應只在東牆。不知彩筆將春興。未遍烏絲尚幾行。
招友不至

故人不肯訪雲蘿。秋事闌珊奈爾何。十里芙蓉俱落盡。相思惟有月明多。
次韻題劉完菴畫

天涯纔見一人還。僧寺來偷半日閒。勘破十年塵土夢。畫中不寫晉陽山。

題劉完庵所遺福公天影閣山水

舊遊詩畫少劉公。人已寥寥閣已空。仙鶴倘來還感慨。只應此地是遼東。

虎丘送陳玉汝赴春闈

峰頭閣酒看湖色。樹上開窓見鶴羣。今日登臨最高處。似君平步入青雲。

題林子山濯足圖

子山趙文敏之甥有隱操

宦塵不染山人足。却寫滄浪濯足圖。果是滄浪能濯足。可曾流到渭陽無。

夏太常為浦士安作雨竹今遺其甥金仲和

楚雲零落楚江秋。日暮令人省舊遊。白水同心十年事。一番聽雨一番愁。

夏太常為仲和寫梢配之

寫玉仙卿老更工。墨池生雨又生風。謝安已去羊曇在。十載瀟湘似夢中。

題方方壺畫

琵琶嶺上丹經熟。海岳庵頭墨法真。草樹依然黃鶴遠。江南思煞未歸人。

題陳啟東竹卷

亭亭碧玉真堪倚。矯矯青鸞不受駭。豈是玄都觀中物。秋風秋雨自江南。
書福公酒病而歿

遊魂何地月蒼蒼。錯認泉臺是醉鄉。一个石幢千載事。酒籌今日為誰忙。
陶朱公知子

見若惜金難贖死。阿翁先見却如神。曾家老母尤能事。自信參兒不殺人。
題號國夫人宴歸圖

倚馬嬌羞認八姨。春酣歸院日斜時。回頭聞得漁陽鼓。猶料催花輟宴遲。
書事

買珠豪客下京城。貂帽狐裘作隊行。大錠價金誇帑物。就傍真鑒貢州名。
其二

百兩高酬一顆圓。吳兒徇利最堪憐。東家白賺西家物。即出門頭自賣錢。
次東原先生與其甥魏公美詩畫韻

蒼蒼筆力似荆關。白髮圖書老不閒。未許羊曇乙西墅。畫中分與舊溪山。

題聽秋翁所遺墨竹

草閣秋風拂舊圖。墨痕猶自濕珊瑚。丈人已化遼東鶴。今日空憐屋上烏。
桃花

活色生香傍石栽。三郎常喜看花來。如何內苑偏消恨。不向青驄蜀道開。
咏妓失環

三月花飛江上春。扁舟愁殺渡江人。就中心事知多少。暗脫明珠贈水神。
送人歸杭

碧玉西湖紅藕花。酒壺月色賸堪賒。蘇州不似杭州好。莫怪行人苦憶家。
太湖竹枝歌

吳江長橋如長虹。西來太湖橋下通。我愛落日水如鏡。照見人影在波中。
其二

蘇州南來是太湖。少見楊柳多桑株。誰家女子在樓上。手揭紅簾看打魚。
贈陳世則

干祿未曾登薦稿。養親還自讀醫書。名園綠水城南路。大樹啼鴉是故居。
獨釣圖次周桐村韻

魚無魚有皆為樂不在任公十二鉤
鵜鵠自沉波繳亂蜻蜓欲立釣絲柔
題顏孝廉公懋扇

齊女門頭顏孝子屋頭樹樹着啼烏
屋中人好烏亦好人有好兒烏好鵲

招金鑾酌鑾出贅陸氏

東老床頭酒正香山尊盛碧待君嘗
還須為我一停棹莫憶他鄉是故鄉

同心堂

一食同餐一被眠弟兄誰似陸家賢
世間多少忘情者不訟黃金即訟田

戲馬千里

春水桃花自到門琵琶聲細月黃昏
試看司馬青衫上濕盡如今是酒痕

葛嶺賈似道故居

不勸君王復兩河亂離時節自笙歌
彈丸最是臨安地廣買公田也不多

其二

閒堂寶閣畫圖中天乞湖山養相公
正是襄樊多事日却將征戰寄秋蛩

其三

客路蕭蕭足馬遲。洛陽橋畔正堪悲。故人莫道無相見。恰在南來北去時。

其四

相府豪華無盡時。誰知榮辱自相隨。開元寺裏多秋暑。淚落西湖舊竹枝。

韜光庵

藤花委迳風能掃。石子布階雲自生。白髮老僧來近客。開門隨口問鄉名。

其二

峰巒曲密松杉暗。臺殿高低紫翠迷。遊屐到門清梵歇。杉鷄飛上樹頭啼。

送人之京

二月閭門楊柳黃。酒波山色照斜陽。別時先話歸來日。莫待梧桐葉上霜。

為陸古狂題畫

三月江南花滿枝。東風未是倦遊時。陸郎自愛春山好。醉裏題詩謝子規。

楚峰雲為吳歌者賦

長安道上晴依柳。平樂樓頭濕傍花。一片迷魂無約束。又遮明月過西家。

其二

英英白地忽相逢。白地相逢意萬重。十二碧峰無不好。為誰邊淡為誰濃。
寄吳狀元原博原博舊有咎鬚之文

文章不是咎鬚時。轉見鬚長文更奇。省殿兩元皆自取。豈憑春夢替劉滋。
觀辛卯浙江鄉試錄寄沈明德

滿院桃花九十株。爛然春色照西湖。沈郎不解修花譜。徹底從頭一字無。
送祥公歸靈隱時劉完庵作古感慨有作

飛花送酒春三月。芳草留人雨一川。蠟燭未銷香炷在。舊遊如夢話前年。

其二

前年記宿老僧房。清夢時時遶上方。龍洞桃花萬松里。再遊惟恨少留郎。
題杜東原試竹

三年鳳鳥不能鳴。一日能鳴便可驚。昨夜碧簾明月下。有人傾耳在秋聲。
偶書

老身默默沉浮裏。薄問悠悠可否間。我也不知如許事。閒梳白髮對青山。
其二

情緣百感晚來生。寂寂空庭默默行。如此浮雲如此月。照人何苦不分明。
望陵圖

眺遠君臣此共登。危闌高起碧雲層。魏徵未必能昏睡。別自分明在獻陵。
贈老人

淚滿雙頤雪滿顛。一身憔悴自應憐。座中誰似楊開府。莫易逢人話少年。
劉德儀索詩畫送錢進士世恒

劉郎送客江頭別。客子揚揚謁帝居。滿眼青雲真可羨。歸來連夜教兒書。
端陽日與吳惟允杜子問雨中讌飲二首

門外有人來看竹。亭中今日正觴蒲。端陽雖作重陽雨。好客能來非索租。

其二

半夜清談破風雨。一燈疎影照溪山。他時看畫知何地。且寄相思水墨間。
為吳惟允題舊畫山水

寫圖又是十年時。今日相看髮有絲。雲石風泉皆可醜。徐凝慚愧重題詩。
送謝朝用尹安仁

黃梅時節雨沉沉。謝令行舟江水深。此去饒州還半月。野人先已候鳴琴。
題鶯

賣詩買酒醉春城。破盡青衫白髮生。四海固無知我者。錯教啼殺樹頭鶯。
送張禮部企鵬還朝

拂水朱旗映畫窓。官船催發鼓鼙鼙。長途筆硯無封事。對寫青山過大江。
與如僧官話舊

記得松陵覓遠公。隔溪鐘磬水雲空。廿年重話今宵雨。白髮相看似夢中。
赤壁

阿瞞回首戰船空。但見周郎一炬紅。千載遺民江上任。至今猶自說東風。
用張外史韻題明公山水

看雲側迳青梨枝。跌月方床白氈袍。不管果園山鳥食。小童隨地拾殘桃。
詠老少年草

朱草能生太平世。彤霞凝葉照深秋。山人相見偏慚愧。老倒西風却白頭。
題畫送丘侯休致二首

浮雲滿目使君行。山水無輝日未晴。明日相思何處是。甘棠樹下獨聞鶯。
其二

江天正有漫漫雪。行客應無緩緩期。越水吳山一千里。輕舟歸去似來時。
補題福公送酒賞菊圖

先公把酒看黃菊。十客于今少六人。無限傷心舊遊地。一籬秋雨對沾巾。
戲方道士中酒

十日酣歌酒不醒。扶頭猶盡玉雙瓶。月明昨夜蕃釐觀。又為吹簫憶幔亭。
畫楊梅答韓克瞻

西山有雨楊梅熟。東老無詩口舌乾。珍重故人知此意。高林摘寄紫瑛丸。
題朱淑真畫竹

繡閣新篇寫斷腸。更分殘墨寫瀟湘。垂枝亞葉清風少。錯向東門認綠楊。
王廷規見訪

江春波綠蔣芽生。孤棹東來見遠情。細話舊遊如夢事。一燈風雨五茸城。
題列仙傳

空為神仙錄姓名。數行殘墨寄長生。青天不是劉安宅。鷄犬于今地上行。
和陸大叅孟昭休政詩韻二首

烏紗歌側髮垂肩。舊是薇垣一懶仙。三徑竹陰芳草歇。也堪行樂也堪眠。

其二

酒友吟朋鎮日來。水邊花草夕陽臺。題詩遍在芭蕉葉。不是封章信展開。
鷄聲

唧唧喔喔苦相催。枕上聞時客夢回。無限人間憂與患。為渠傳送上心來。

聞歌憶王畏齋

風流文采今誰似。到處春遊有所思。千樹垂楊一黃鳥。清歌疑在習家池。
次張汝弼與友人夜話詩韻

南安太守有清詩。文物風流似晉時。空向人家看醉墨。幾篇風雨濕烏絲。
蕉石圖送顧一松

鶴程輕算亦三千。歸去玄都只瞥然。洞口碧蕉秋葉大。新詞閒錄小游仙。
人以墨菊見遺復畫菊答之戲作一首